


TEZAUUR LITURGIC

29 APRILIE

ACATISTUL SF.9 MUCENICI DE LA CIZIC



MOSCOVA, 2000



АКАФИСТ

СВЯТЫМ ДЕВЯТОЧИСЛЕННЫМ

МУЧЕНИКОМ, ИЖЕ В КИЗИЦЕ

Кондак 1

Избрании от Царя Сил, Господа Иисуса, /
страстотерпцы Христовы девяточисленнии, / от
различных стран в граде Кизице во едино
собрании / и Христа дерзновенне, мук и смерти
не убоявшеся, исповедавшии, / торжествуем
духовне во святем празднице вашем / и,
воспевающе благодатную терпения вашего
доблесть, / молим вас, вои Христовы
многострадальнии и утверждении в воле
Христовой, / и нам спасения испросите,
зовущим: /

Радуйтесь, прехвальнии / мученицы Христовы
девяточисленнии.

Икос 1

Яко Ангели премирнии, вознесшеся мыслию от
земных к небесным, ко Христу, Владыце всех,
непрестанно веры очима взирающе, мученицы
святии, Феогниде, Руфе, Антипатре, Феостихе,
Артемо, Магне, Феодоте, Фавмасие, Филимоне,

посреде кумиротслужителей града Кизического исповедасте себе безбоязненно христианы быти и, силою Божиею укрепляеми, многия муки мужественне за Христа претерпесте и под меч главы ваша преклонисте, темже, ублажающе страдания ваша и усекновение, глаголем:

Радуйтесе, земныя радости презревшии;

Радуйтесе, благ небесных возжелавшии.

Радуйтесе, исповедницы Христовы непобедимии, веру непорочну соблюдшии;

Радуйтесе, страсти Христове последовавшии и смерть Христову смертию своею подражавшии.

Радуйтесе, силою Воскресшаго державу адову поправшии;

Радуйтесе, души своя в руце Божии предавшии и победныя венцы приемшии.

Радуйтесе, прехвальнии мученицы Христовы девяточисленнии.

Кондак 2

Видяще идилов полн сушь град Кизический, вы, о богомудренное мучеников Христовых сочетание девяточисленное, возмутитесе духом и, ревностию о Бозе горяще и благодатию

Божественною укрепляеми, начасте провещавати и учити о имени Господа Иисуса, заблуждение идольское обличающе; людие же, тьмою неверия ослепленнии, взяша вас абие и связанных, аки злодеев, градскому в Кизице князю на истязание представиша; вы же стасте пред нечестивым князем и, оболкшеся во вся оружия Божия, яко воины Христовы вернии, никакоже отступисте от взбраннаго Воеводы, Господа своего, взывающе Ему: Аллилуиа.

Икос 2

Разумевше , яко претерпевый до конца, той спасен будет, терпением текосте, страстотерпцы Христовы, на предлежащий вам подвиг, взирающе на Начальника веры и Совершителя Иисуса, и муки и терзания телес ваших претерпели есте, радующеся и красующеся ранами, яже подъяли есте за любовь ко Господу вашему, темже:

Радуйтеся, яко Христа Господа, за ны душу Свою на Кресте положившаго, и вы, святии мученицы, взаим возлюбисте;

Радуйтеся, яко потщастеся Тому быти подобны мук терпением.

Радуйтесь, страдания и муки в торжество веры обратившии;

Радуйтесь, Христа ради излившимися кровью прославлении.

Радуйтесь, яко блаженна земля, напоившаяся кровью вашими;

Радуйтесь, яко души своя любовью за Христа положисте.

Радуйтесь, прехвальнии мученицы Христовы девятчисленнии.

Кондак 3

Силою Божиею укрепляемии, мученицы девятчисленнии предивнии, не убоястеся прещений зловернаго князя Кизическаго, ниже козней невидимаго князя мира сего, но свидетельствовасте о Христе Иисусе, усты вашими исповедающе Того истиннаго быти Бога, Той бо даде вам уста и премудрость, имже не можаше что противу отвещати мучитель, но посрамляшеся, истиною побеждаемый, еще же и страданьми вашими свидетельствовасте все ваше к Богу желание, и ужасахуся людие, видяще ваше доблественное терпение, и познаваху на вас силу и помощь всесильнаго Бога, Емуже взывасте: Аллилуиа.

Икос 3

Имуще в памяти словеса Господня: и влас главы
вашея не погибнет, веровасте тако: не токмо
власы, Христа ради терзаемии, цели явятся во
славе воскресения, но и самое тело, раны и
раздробление за Христа претерпевшее, цело
возстанет со славою многою. Сего ради,
страстотерпцы Христовы досточуднии, верою
укрепляеми и о надежде славы Божия
хвалящися, доброе течение мученическаго
подвига совершите и души своя святыя в руце
Бога предасте, темже и мы возносим вам сия
песенныя хвалы:

Радуйтесь, пречудное мужество явившии;

Радуйтесь, яко надеждою воскресения Христос
непобедимы вас пред мучители сотвори.

Радуйтесь, яко Христос преобразит тело
смирения вашего, во еже быти сему сообразну
телу славы Его;

Радуйтесь, вечныя блаженныя жизни
сопричастницы.

Радуйтесь, яко со Ангелы песнь победную
воспеваετε.

Радуйтесь, прехвальнии мученицы Христовы девяточисленнии.

Кондак 4

Мучимый за святую веру во имя Христа Господа, буря искушений и бед возшуме на тя, Феогниде, но не возможе поколебати храмины души твоея, основана бо бе на Камени, Иже есть Христос, Сын Бога Живаго; егда бо приведоша тя к князю градскому на судище, тебе, во свидетельство мучителем, ни темница, ни жестокая биения и раны не отвергоша от Христа, но, по земле протяженный и нещадно жилами биенный и ногтями железными стружаемый, в страдании крепок и мужествен явился еси, струями же кровей своих, яко багряницею, одеаяся и сердечное око к Богу вперив, воспевал еси Ему: Аллилуиа.

Икос 4

Слышавше грозное повеление владыки нечестиваго, да отвергшеся Христа, жертвы принесете идолом, видяще же мучительская орудия, уготованная на вы, страстотерпцы достославнии, помыслисте день втораго пришествия на землю Владыки Христа и нестерпимый гнев суда Его, егда приидет во славе Своей с небес и вси святии Ангели с Ним;

сего ради, воины Христовы, неодоленные в терпении мнозе, предастесь на раны и муки Царствия ради Небеснаго, примите убо от нас хвалебныя песни сия:

Радуйтесь, помянувшии словеса Господня: отвергшийся Мене пред человеки, отвержен будет пред Ангелы Божиими;

Радуйтесь, внимавшии глаголаным от Христа: не убойтесь от убивающих тело, души же не могущих убить, убойтесь же паче могущаго и душу, и тело погубить в геенне.

Радуйтесь, рекшии сами себе: мучительства ярых человек временна суть, муки же геенския вечны; да избудем мук вечных, временных убоятися не имамы;

Радуйтесь, рабы Христовы, вернии даже до смерти, имже воздаст Господь венец живота.

Радуйтесь, яко на страшнем судищи Господь сущим одесную сопричет вас и части возлюбивших Его сподобит;

Радуйтесь, имже речет Царь Славы: приидите, благословеннии Отца Моего, наследуйте уготованное вам Царствие от сложения мира.

Радуйтесь, прехвальнии мученицы Христовы девяточисленнии.

Кондак 5

Боготечная звезда, путеводящая к Солнцу Правды - Христу Богу, явился еси, святыи мучениче Руфе, и светом подвига твоего страдальческаго возсиял еси людем, во тьме неверия сидящим, сила бо благодати Господни в немощи твоей совершашеся. Сего ради, связанныи по рукама и ногама, безчестие и поругание претерпел еси, на муки дерзнул еси и жизни не пощади еси за Господа своего, но, жезлием и бичи узлаты жестоко биен и огнем опаляем, взывал еси к Нему велегласно:
Аллилуиа.

Икос 5

Видевше себе в узах страждущия за имя Господа Иисуса Христа, Егоже возлюбисте и в Негоже веровасте, вы, страдальцы Христовы девяточисленнии, Духом Святым в скорби вашей и тесноте темничней утешаеми, радующесея, друг ко другу глаголасте: плоти и крови не пощадим, станем небоязненно ко всякому мучению, умрем о Христе, да во вся веки проживем с Ним, ликующе непрестанно.

Темже, подвиги ваша чудныя славяще,
восхваляем вас сице:

Радуйтесь, сердца ваша в руке Божии
положившии;

Радуйтесь, благодати Святаго Духа избрании
сосуди.

Радуйтесь, прекрасное Духа Святаго жилище;

Радуйтесь, правду, мир и радость о Дусе Святе
стяжавшии.

Радуйтесь, вечныя нам радости благоприятнии
ходатаи;

Радуйтесь, Духом Владычним утверждении,
Имже радость спасения о Господе дадеса.

Радуйтесь, прехвальнии мученицы Христовы
девятичисленнии.

Кондак 6

Проповедник Христова нас ради страдания
явился еси, мучениче святой Антипатре, к
столбу бо привязанный и терновными розгами
биен злобными мучители, сообразен был еси
Христу Господу, венцем от терния увенчану.
Сего ради ко Христу взирал еси, нас ради
уязвленному и поруганному, и, терпя за Него

многия муки, якоже и Той претерпе за ны, воспевал еси Ему, Владыце твоему, от любви крепкия: Аллилуиа.

Икос 6

Возсиясте, святии девятчисленнии страстотерпцы, в граде Кизице светоч добродетелей христианских, яко светоносных звезд сходжение, и просветисте ночь глубокую идолослужения. Христос бо Господь манием Своим Божественным посла вас, яко овцы посреде волков; вы же Агнцу Христу, волею закланному за мир Сыну Божию, истиннии последователие показастесь, мудростию Божиею, яже о Дусе Святе, просвещаемии, уразуместе мимоходящую жизнь и нерадисте о муках, вечныя ради жизни правую веру соблюдасте, о чесом удивляющесе, вопием к вам сице:

Радуйтесе, яко по слову Господню, мудри яко змия, мудри во благое, и цели яко голубие, прости во злое, бысте;

Радуйтесе, яко подобящесе Христу, Иже кроток бе и смирен сердцем, и вы досады и укорения кротце претерпесте.

Радуйтесь, яко в злостраданиих не противистесь озлоблявшим вас, но во смирении вашем яко овцы на заклание ведостесь;

Радуйтесь, яко добродетелем Христовым подражасте в житии своем.

Радуйтесь, агнцы, Христу себе в жертву принесшии;

Радуйтесь, ихже Христос ублажи и наследники земли живых показа.

Радуйтесь, прехвальнии мученицы Христовы девятчисленнии.

Кондак 7

Хотя враг спасения рода человеческого устрашити тя, небоязненнаго воина Христова, страсотерпче святой Феостихе, подвиже на гнев и ярость злочестиваго князя града Кизика, иже повеле люте мучити тя; ты же, биен быв палицами без пощадения, чрепы строган и рожны избоден, благодарил еси Христа, яко сподоби тя мучения страдати, славы ради имене Его святаго. Силою Божиею укрепляем, отразил еси совет невидимаго врага и верно воспевал еси Богу: Аллилуиа.

Икос 7

Дивный Христос Бог и прославляйся во святых Своих, дарова вам, мученицы, не токмо единомудренне в Него веровати, но и ходити единомышлением в добром исповедании Божества Его и по Нем страдати. Христос бо собра вас, пресветлое мученическое воинство, в собор мучеников един, в Церковь Бога Жива, и пребысть с вами, темже радостно приносим вам таковая:

Радуйтесь, яко и вам рече Господь во Евангелии: идеже еста два или трие, собрани во имя Мое, ту есмь посреде их;

Радуйтесь, яко и вас утеши евангельским глаголом: в мире скорбни будете, но дерзайте: Аз победих мир.

Радуйтесь, яко и вам обетова, глаголя: се Аз с вами есмь во вся дни до скончания века;

Радуйтесь, яко дадеся вам победа Господем нашим Иисусом Христом.

Радуйтесь, яко благодатию Божию укрепляеми, противитися мучителем, паче же и всей диавольстей силе, возмогосте;

Радуйтесь, яко Христос Бог бысть вам столп крепости от лица вражия.

Радуйтесь, прехвальнии мученицы Христовы девятчисленнии.

Кондак 8

Странноужасную и жестокою шествовал еси стезю, Артемо, мучеником славо, к колеси привязанный и сверху горы долу низпущенный, яко уди твои сокрушишася. Путь же твоего страдания подобно свету светится, Света Незаходимаго лучами озарен, зане на Господа взирал еси, мыслию и любовью ко Христу привязан. Христос бо Сила, Бог и Господь, Емуже взывал еси, страстотерпче: Аллилуиа.

Икос 8

Весь сонм ваш, мученицы святии девятчисленнии, надеястесь на Христа Бога нашего, яко иматъ с высоты смотрети на подвиг ваш со множеством святых Ангелов и помогати вам, немощным, будет. Верен же Бог, Иже не остави вас искуститися паче, еже могосте, но сотвори со искушением и избавление, яко возмощи вам понести, темже приимите от нас похвалы сия:

Радуйтесь, яко Бог утешит вас во всякой скорби вашей;

Радуйтесь, зане якоже избыточествоваху страдания Христова и вас, тако Христом избыточествова и утешение ваше.

Радуйтесь, яко сила Христова вселися в вы, сего ради вся возмогосте о укреплявшем вы Иисусе Христе;

Радуйтесь, яко любви Божия излися в сердца ваша Духом Святым и дарова вам упование славы Божия непостыдное.

Радуйтесь, яко Господь Сил, Помощник в скорбех, с вами бысть, и ничтоже возможе вас разлучити от любви Божия;

Радуйтесь, яко души ваша, яко птицы, избавишася от сети ловящих и возлетеша в прекрасная селения райская.

Радуйтесь, прехвальнии мученицы Христовы девятисотлетнии.

Кондак 9

Все тело твое уязвенно до костей имел еси, добрый страдальче Магне, егда мучитель, обнажив тя, на земли простре и бияше по хребту

без милости и по чреву надолзе, таже клещами разжженными терзаше тя. Господь же, невидимую силою тебе соприсутствуя, облегчаваше болезни твоя и утверждаше сердце твое в терпении и любви Божественной, темже в муках воспевал еси Христу Богу: Аллилуиа.

Икос 9

Витии многовещаннии не возмогут изрещи вам достойныя хвалы, мученицы Христовы девятчисленнии, мечем бо преклонисте выи Христа ради, преклонышаго небеса и сошедшаго, и излиясте кровь вашу, общницы Сего страстей бывше. Мы же, недостойнии, сия песенныя дары приносим вам, глаголюще:

Радуйтесь, Христос бо даде вам чашу Свою пити и крещением, имже Сам крестися, креститися;

Радуйтесь, яко пред очима суть Божиима путие и подвижи ваши.

Радуйтесь, Христа вседушно возлюбившии;

Радуйтесь, яко со Христом пострадасте, да с Ним и прославитесь.

Радуйтесь, вечную славу и одеяние нетления от Него приемшии;

Радуйтесь, яко сокровища небесная вас прияша, яко пшеницу зрелу.

Радуйтесь, прехвальнии мученицы Христовы девяточисленнии.

Кондак 10

Спасти пришедшаго мир, любовью Сына Божия разжигаем, Феодоте мучениче, огня сильнейший явился еси. На сковраду пальну, вельми разжжenu, наг возложенный, таже в клокочущий коноб вверженный, опаление и муку горькую доблественне презрел еси; от любве же Христовы никакоже разлучився, Тому пел еси умиленно: Аллилуиа.

Икос 10

Царю Предвечному, Христу во всем послушливи бывше, мученицы многострадальнии, от различных мест и стран в Кизице собрастесе во едино, и, во град вшедше, Христа Сына Божия, во плоти пришедшаго, проповедасте, славнии, и без страха слово Божие глаголасте. Егда же людие града Кизика благовествования Христова не прияша, вас же мукам и казням и лютой смерти предаша, вы, благовестницы Божии, исходяще оттуда не телом, но душею, не прах, прилепший вам от града, оттрясосте им от ног

ваших, но брeнная телеса ваша, за благовестие Христа умученная, остависте во свидетельство на ня в день судный, темже благоговейно взываем вам:

Радуйтeся, вашими христопоследовательными стопами во град Кизик шествовавшии;

Радуйтeся, Евангелия Христова благовестницы.

Радуйтeся, яко Бога воплощенна проповедасте;

Радуйтeся, яко муки, огонь и мечное усечение за Него в сладость вменисте.

Радуйтeся, яко людем, иже не прияша вы, ниже послушаша вас, во свидетельство подвига вашего, во спасение их подъятаго, телеса ваша честная остависте;

Радуйтeся, яко течение мученическаго подвига добре скончаша, веру соблюдоша, прочее соблюдется вам венец правды.

Радуйтeся, прехвальнии мученицы Христовы девяточисленнии.

Кондак 11

Пение приносим, Фавмасие, тебе, мучениче. Душа твоя яви крепкое терпение и подвига доблесть, приложиша бо тебе немилостивии

мучителие раны к ранам и болезни к болезнем, ибо ножем избождаху и резаху плоть твою, еще же и копием ребра твоя люте пронзиша. Ты же, мучениче Фавмасие, сообразен быв Христу Господу, на Кресте от единого из воинов копием в ребра прободенному, глагола еси, радуяся и славя Бога: Аллилуиа.

Икос 11

Светоприемная богосиянная свеща сушим во тьме неверия и многобожия идольскаго явишася нетленная телеса ваша, святии девятчисленнии мученицы. Егда, воцарившуся великому Константину, преста гонение и свет благочестия возсия по вселенней, тогда бо в Кизице, в храме вашем, многая чудеса и исцеления от святых мощей ваших быша, и того ради множество народа невернаго обращахуся ко Христу. Темже в похвалу вашу зовем:

Радуйтесь, яко людие града Кизика, зряще благодать Божию, в многоцелебных мощех ваших чудодействующую, прияша святую веру во Христе;

Радуйтесь, яко идоли и идольстии храми в Кизице сокрушишася, а вместо тех храми Божии воздвигошася.

Радуйтесь, податели неоскудни исцелений;

Радуйтесь, велия бо ваша, мученик Христовых, богоблагодатная сила, во гробех бо лежите и души злобы прогоняете, и, яко живи, верою притекающим даете прошения.

Радуйтесь, яко чудес предивных сиянием верныя озаряете и неверныя ко Христу обращаете;

Радуйтесь, святыя бо мощи ваша яко знамя победное всем явишася.

Радуйтесь, прехвальнии мученицы Христовы девятчисленнии.

Кондак 12

Благодать Божественная укрепляше тя в мученичестем подвизе, Филимоне страсотерпче: за ребра багром железным оцепленный и на древе ужасно повешенный, непреклонен пребыл еси во исповедании Христа и Бога, Емуже хвалебную песнь воспевал еси: Аллилуиа.

Икос 12

Поюще многая и преславная чудотворения ваша, восхваляем вас, всехвальнии мученицы

Христовы девяточисленнии: егда бо в Кизице благовернии христиане телеса ваша, из-под спуда земнаго изъемше и нетленная обретше, в храм, во имя ваше созданный, внесоша, чудесы, яко светлыми лучами, возсиясте от святых мощей ваших. Мы же, любовьию воспевающе данную вам от Бога благодать исцелений, зовем:

Радуйтесь, яко по кончине вашей чудесныя целеб источники источи Христос Бог в прославление ваше;

Радуйтесь, духов нечистых от человека прогонителие.

Радуйтесь, сляченных целителие и трясавичными болезньми одержимых всеконечнии уврачевателие;

Радуйтесь, яко воднаго труда избавися муж некий, прикоснувся честней раце мощей ваших.

Радуйтесь, яко и самим призыванием честных имен ваших трясавичный недуг отгоняется и всякая болезнь всех с верою притекающих врачуется;

Радуйтесь, добропобеднии мученицы, венцы победы от Христа Спаса нашего увенчаннии, яко страдания ваша возмеришася вам славою и честью Царствия Небеснаго.

Радуйтесь, прехвальнии мученицы Христовы девяточисленнии.

Кондак 13

О добропобеднии и многострадальнии мученицы Христовы девяточисленнии, милостивно примите от нас, недостойных и грешных, возносимое к вам ныне хвалебное песнословие; и, яко предстоятелие горния славы, имущии дерзновение много ко Христу Богу нашему, помяните ны, ублажающия вас любовью и чтущия ваша чудныя подвиги; испросите нам у Господа оставление грехов, в вере утверждение, в добрых делех укрепление, от бед и напастей избавление, да всегда благодарными усты воспеваем Богу: Аллилуиа.

Этот кондак читается трижды, затем 1-й икос и 1-й кондак.

Молитва 1

О всехвальнии святии мученицы, доблественнии раби Христовы, Феогниде, Руфе, Антипатре, Феостихе, Артемо, Магне, Феодоте, Фавмасие и Филимоне, иже Христа ради от различных стран собрастесе и Того совершенна Бога и Человека дерзновенно в Кизице проповедасте; принуждаеми бывше кумиром поклонитися,

идолы попрасте и князя посрамите, различных томлений и огненных прещений не убоястесь, и по различнем страдании острием меча посечени бысте, и пролиясте за Христа кровь свою, яко воду, и тою, яко багряницею, Церковь Христову, яко невесту, украсисте; темже и ныне, увенчанныи неувядаемым венцем безсмертныя славы, присно в неизглаголанней радости с лики ангельскими в небесных селениих водворяетесь, Божественным светом облистаеми и зрением Его доброты неизреченныя наслаждающесь. Сего ради и мы, смиреннии, к вам притекаем и, умильно на святой ваш образ взирающе, молим: вы молитесь за ны Христа Бога, яко дерзновение к Нему имущии, да вашими святыми молитвами всякаго недуга душевнаго и телеснаго избавимся. Вам бо от Бога дадеся врачевный дар от всяких скорбей с верою к вам припадающия целити, якоже и онаго славнаго мужа от трясавичныя болезни уврачевасте, да и мы, вернии, тожде получивше, почитаем вас, святии мученицы, толика дарования имущих от Христа Бога, Емуже и слава купно со Отцем и Духом Святым всегда, ныне и присно и во веки веков. Аминь.

Молитва 2

О велицехи угодницы Божии, святии мученицы Христовы: Феогниде, Руфе, Антипатре, Феостихе, Артемо, Магне, Феодоте, Фавмасие и Филимоне! Вы Царя Христа вернии слуги бысте и подвигом добрым подвизастесь, претерпевше за Него муки; темже, по неложному Его глаголу: идеже есмь Аз, ту и слуга Мой будет, - и вы ныне со Ангелы предстоите Владыце Христу и с высоты небесных славы призираете милостивно на храм ваш и на моляющихся в нем.

Умолите убо Господа Сил Церковь Его Святую и православное Отечество наше сохранить от напастей и бед, от всех враг видимых и невидимых, низложити прелесть неверия и безбожия и стадо Христово избавити от волков, губящих е, глаголющих лукавое - доброе, и доброе - лукавое, полагающих тьму - свет, и свет - тьму; от шатания умов, яко трость, ветром колеблемых, и от греховнаго душ расслабления.

Богодарованную благодать чудес ваших, мученицы Христовы девятчисленнии, прострите ко всем нам, верую к вам прибегающим, и вся наша недуги душевныя и телесныя уврачуйте, и вся прошения наша во благо исполните.

Ей, страсотерпцы святии, молитте за ны Господа, да низпослет нам Божественную благодать и дар Святаго Духа, всегда немощная врачующаго и оскудевающаго восполняющаго, во ежи соделовати нам спасение свое, заступлением Христа Спаса нашего, и избавитися нам от сети вражия и грехов, и помиловатися душам нашим, да и мы купно с вами и всеми святыми прославим Бога, в Троице славимаго, Отца и Сына и Святаго Духа. Аминь.

